



Signur Schüüch el purtret: Egl archiv che la Pro Laax ei vidlundeŕ da fundar, san ins admirar biars dessegnis tipics da Hans Moser. FOTO A. BEELI

In archiv satiric a Laax

La Pro Laax ha retschert il relasch da Hans Moser

■ (anr/abc) El ei staus in dils pli enconuschents caricaturists dils davos 50 onns. El ha commentau cun tusch e siu stilografit. Hans Moser che ha habitau dapi 1963 a Laax ha registrau nundumbrevilas caussas a Laax. Bunamein mintga «toffa» ch'ei schabegiada dapi lu a Laax ha el mess sin pupi. Ses dessegnis tipics han accumpignau Flem, Laax e Falera duront 50 onns. Igl ei stau ils onns dil grond svilup. Hans Moser ch'ei morts ils 3 d'october ella vegliadetgna da 90 onns, ha aschia scaffiu in archiv satiric-historic dalla regiun. Avon quater

onns eis ei stau sia voluntad da surschar sias pli preciusas caussas da sia lavur artistica alla fundaziun Pro Laax. Lezza haveva organisau avon treis onns ina davosa retrospectiva nua ch'ins ha saviu admirar biaras da sias ovras legendaras. Il «bab» dil vagabund Clo-schi e dil «Herr Schüüch» han giu ina special-buna relaziun culs da Laax. El haveva bugen la gliעד. Siu archiv sco schenghetg als da Laax vegn era a restar in truchet da regurdientschas dil svilup turistic e dallas midadas.

In dacasa per Closchi e Herr Schüüch

La Pro Laax depona il relasch da Hans Moser

DAD AUGUSTIN BEELI / ANR

■ **Entschatta october ei il caricaturist Hans Moser morts ella Casa S. Martin a Trun ella vegliadetgna da 90 onns. El valeva sco in dils pli enconuschents dessignaders en Svizra. Igl onn 1963 era el arrivaus a Laax cun sia dunna Sonja ed ils quater affons. Cheu ha el baghegiu casa, ha catschau ragischs ed ei daventaus meriteivel burghais d'honor da Laax. Avon quater onns haveva el surdau siu relasch artistic alla Pro Laax. Lezza cataloghisescha dapresent quel. Avon treis onns ha igl artist Hans Moser organisau la davosa gada in'exposiziun cun sias ovras. Ellas localitads dil CCM a Laax han ins giu caschun d'admirar ina massa da sias ovras. Ses dessegn tipsics cun tusch, biars da quels colurai, auters mo en alv e ner. Sia nodacasa eran ils dessegn fins cungi cun sarcassem ed ironia. Numerus cartoons cun sias duas figuras caracteristicas ed enconuschentas : Herr Schüüch dil Nebelspalter e Closchi che ha accumulau biars onns la gasetta locala «Arena Alva» ed era la «Terra Grischuna».**

Tschiens e tschiens, mellis e mellis

Igl onn 2008 haveva Hans Moser decidiu da regalar sia entira ovra artistica alla fundaziun Pro Laax. Culs da Laax haveva el in zun bien contact, Hans Moser s'udeva tiel vitg. Mintga caschun, mintga eveniment, mintga fiasta locala e mintga actualitad che schabegiava a Laax e contuorn ha el commentau cun tusch e color. Enviars la gronda unda turistica dils onns siatonta ha el priu posiziun. Tschiens e tschiens dessegn, forsa mellis



Dapresent vegn il relasch conservaus e luvraus si ella Casa De Mont: Maletgs, dessegn, skizzas, cudischs e tutta lavur artistica da Hans Moser fuorma ina impurtanta documentaziun dil svilup da Laax e contuorn.

FOTO A. BEELI

e mellis, hagi Hans Moser fatg en sia veta, haveva «La Quotidiana» scret il 13 da fevrer 2002 el portret che era cumpariu quei gi per siu 80avel anniversari.

Contas ovras ch'igl ei exact, tschiens e tschiens ni mellis e mellis, ei aunc buca clar. Quei che Hans Moser ha perinagada regalau alla Pro Laax empleina dapresent ina retscha d'ordinaturs gross.

Claudio Coray, il president dalla fundaziun Pro Laax, conferma ch'ins seigi vidlunder da luvrar si tut il relasch da Hans Moser. Sper biars originals en color e ner/alv ha ei era denteren serias cun sias renomadas figuras, Herr Schüüch e Closchi.

La fundaziun fa dapresent ils catalogs cugl inventari da tut quei ch'ei registrau.

Dessegn tenor tematicas, originals, sia meisa da lavur cul material da skizzar e dessignar, lavurs e collaschas ch'el ha fatg da sia veta. Hans Moser ha luvrau cunzun per la gasetta satirica Nebelspalter, mo era per l'inglesa «Herald Tribune». Ses dessegn critics e satirics, cul boom da baghegiar el center ein legends. Per exempel la caricatura dil skiunz che va

culla sutgera tras il clutger dalla baselgia da Laax. Ni quella digl um cul barbis cun capiala isada. Ord il sac da caulschas crodan bancnotas. Igl um ei denton pigliaus. El ei serraus en – dils profils ch'ei entuorn el. Era il dessegn cul pirat che smanatscha culla pistola giud la petga dalla pendicularas ei pura satira.

In archiv particular da Laax

Hans Moser ha commentau ils eveniments e dau anim a ponderaziuns. Siu relasch artistic s'auda tier Laax, igl ei sco in archiv da memoria da schabetgs e svilups. Ina ierta culturala. Era il pionier Walter Gurtner ha Hans Moser buca schanegiav. Tgi che vegneva «attaccaus» da sia plem gitta seresenteva, auters buca. El commentava criticamein, cun tusch e color ha el creau in cumpendi divertent-ironic dil svilup da Laax sco destinaziun turistica. La primavera vargada haveva Hans Moser stuiu sedecider da bandunar il liug nua ch'el e sia dunna habitavan dapi 1966 e prender dimora ella Casa S. Martin a Trun. La Casa Mundaun el quartier Caplania – dil eminent l'emprema a Laax el stil da Tarcisi Maissen – ha stuiu vegin svidada. Hans Moser ei adina sesentius – malgrad ch'el era renomus e sias figuras han survegniu status da cult – sco normal convischin da Laax. Cun surschar siu relasch artistic alla fundaziun Pro Laax ha el vului dar anavos a Laax zatgei da quei ch'el haveva retschiert da quella vischnaunca. Laax seigi per el sco ina gronda famiglia, haveva el getg avon diesch onns al schurnalist da «La Quotidiana». E la gronda famiglia ha ussa in niev archiv particular.